



Rabu, 2 Maret 2022
Ogen: Esekiel 29:1-16



Lume Dingen Terulang



Lume dingen terulang, bage me kecibal bangsa Mesir si ituriken Dibata man Esekiel. Tupung Israel i pembuangan Babel, Tuhan pe mereken ukumen man Raja Mesir ras kerina rakyatna. Mesir si pernah jadi penundalen bangsa Israel tupung ia ijajah bangsa Asyur. Ipindo Israel penampat man Mesir, nggalar upeti pe labo dalih gelah Mesir nampati ia. I je Mesir megombang man Dibata alu nuruh Israel nembah dewa-dewa siisembahna. Nina gegehen nge dewa kalak Mesir asangkan Dibata si isembah kalak Israel. Perbahanen kalak Mesir enda me si erbahansa kitik pusuh Dibata. E maka la pediatNa terdauhen igombang-gombangi kalak Mesir.

Ikataken Tuhan maka Mesir e desken sada ciken si medate, labo ergegeh janah labo terarapken mulahi perbeben kalak Israel. Iukum Tuhan bangsa e alu namaken ia ku bas tentara-tentara si mbisa, si munuh bangsana kerina alu pedang. Kernep me kerina bangsa Mesir, dingen kutana lume ras terulang. Lanai lit jelmana, lanai lit penghunina. Empat puluh tahun dekahna la lit jelma entah rubia-rubia si nggeluh i je. Kenca lepas empat puluh tahun e, ipediat Dibata bangsa Mesir mulih ku kutana, jadi sada bangsa si lanai megegeh. Labo kai pe banci ibahanna nandangi bangsa sideban.

Bage perbahanen Dibata situhuna mereken pengajaren man Israel bage pe man banta. Bangsa doni enda erbatas kal nge gegehna ras labo tertandingisa kuasa Dibata si mbelin e. Ise pe labo ngasup naluken kuasa Dibata e. Alu ngiadah perbahanen Dibata e lit min perubahen i bas kalak Israel, gelah ulanai erpenundalen man manusia. Ulanai erpersukuten man pemeteah manusia i doni enda uga gia sekali bangsa e gegehna. Sabab lit nge paksana manusia e lanai ergegeh, lanai erdolat. Manusia erbatas kal kengasupenna lako nampati kalak sideban.